

**ACF TA TRECE NATURALES
CERCA DI E COMUNIDAD
DURANTE OPENDAG DI
MARINIERSKAZERNE**



WWW.SOLODIPUEBLO.COM



SOLODIPUEBLO@GMAIL.COM

**VIRUS MORTAL:
HANTAVIRUS TA
CAUSA PANICO RIBA
CRUCERO Y KLM!
LOKE BO MESTER SA**



**PARLAMENTARIO
XIOMARA MADURO RIBA
E RESTAURACION DI FORT
ZOUTMAN: PONE E ECHO DEN
CONTEXTO CORECTO**



**CU UN SURPLUS DI 500
MIYON FLORIN, GOBIERNO
TA PONE UN MISERABEL 3.5
MIYON FLORIN PA ASFALT!**

Parlamentario Dangui Oduber:

CU UN SURPLUS DI 500 MIYON FLORIN, GOBIERNO TA PONE UN MISERABEL 3.5 MIYON FLORIN PA ASFALT!



Minister Herde tabata presente den Parlamento pa trata e presupuesto 2026 di DOW (Dienst Openbare Werken). Un presupuesto cu nos a spera lo a trece alivio pa pueblo, specialmente pa e miles di automobilistanan cu ta uza nos careteranan

diariamente. “Esey lamentablemente no tabata e caso, sino mas bien un ‘Wishful thinking,’” Oduber a expresa.

Surplus mionario pero camindanan na werki

Bo lo a pensa cu un gobierno cu tin abundancia di placa, cu un surplus di 500 mion florin, lo tabatin oido pa esnan cu ta sclama pa un miho infraestructura. Parlamentario Oduber a resalta e realidad amargo di e automobilistanan cu mester core diariamente riba camindanan di tera y careteranan yen di buraco. ‘Nos ta papia di camindanan na werki cu ta

daña tire, rim y shocks di e automobilista. Nos a spera hopi mas comprension di parti di gobierno, mirando e cantidad di placa cu nan tin pa dispone di dje,” Oduber a expresa.

E contrast ta bisto: tur siman Minister Wever ta gaba con bon e situacion financiero di pais Aruba ta y con nos credit ratingsnan a subi. Sinembargo, Oduber ta cuestiona dicon e “bon situacion” aki no ta traduci den alivio pa e pueblo.

Di 18 Mion pa un Miserabel 3.5 Mion

Loke Parlamentario Oduber ta considera mas condenabel, ta e echo cu Gobierno a kita 18 mion

florin cu tabata destina pa asfalta e diferente careteranan di Aruba. Segun e Parlamentario, e unico argumento cu e minister “pinch hitter” Herde tabatin pa e decision aki, ta cu tin un minister nobo y un maneho nobo. Pa ta exacto, Parlamentario Oduber a recorda cu dia 24 di februari 2025, DOW a tene un conferencia di prensa caminda a anuncia cu ta bay inverti e 18 mion florin cu Gabinete Wever-Croes 2 a presupuesta, pa drecha diferente camindanan. Sinembargo, despues di e cambio di gobierno, Minister Herde a dicidi di KITA e fondo aki.

Ora a pensa cu lo a kita e suma ey pa pone mas, Minister Herde a bin pone

un miserabel 3.5 mion florin pa asfalta pa aña 2026. Oduber a enfatisa cu den un pais cu ta produci 7 biyon florin y un Gobierno cu tin un surplus di 500 mion, esaki ta bergonsoso. Esaki ta mas bien un falta di respet pa pueblo, pa pone solamente 3.5 mion florin pa drecha camindanan, un suma cu ta yega pa apenas 7.5 kilometer di caminda.

“Esaki ta un falta di respet! Mientras pueblo ta sclama pa miho caminda, gobierno ta inverti placa unda nan kier y no unda e necesidad real ta. Un surplus di 500 mion y bo ta pone 3.5 mion pa asfalta? Esey ta un bofta den cara di pueblo!,” Oduber a conclui

CAS DI CULTURA; TEATRO TA CUMINSA NA MUCHA

Oranjestad, 6 May 2026- Cas di Cultura y Grupo di Teatro Senguene ta sigui cu nan compromiso pa cultiva creatividad y aprecio cultural bou di hubentud di Aruba pa medio di e produccion di teatro infantil “Hans y Gretita,” cu lo wordo presenta pa e festival di teatro Little Stars na fin di mei.

Mas cu djis un presentacion teatral, e produccion tin como meta pa introduci muchanan y famianan na e magia di teater bibo for di un edad jong, yudando fomenta imaginacion, confiansa, expresion artistico, y un aprecio duradero pa e arte di actuacion. Pa medio di

contamentu di historia, musica y presentacion riba escenario, participantenan jong ta haya e oportunidad pa desaroya habilidadnan creativo y social valioso mientras cu e publico ta experiencia e poder unico di teater como un herment cultural y educativo.

E muchanan cu ta tuma parti na e produccion aki ta studiantenan di scolnan partisipante, Scol Soeur Juliette, Colegio Santa Filomena, y St. Paulus School, dunando studiantenan jong e oportunidad pa envolvi activamente cu arte na un manera significante y inspirativo.



Door di inverti den iniciativanan di teater hubenil, Cas di Cultura y Grupo di Teatro Senguene ta spera di inspira un generacion nobo pa conecta cu arte.

Ta encurasha publico pa sigui Cas di Cultura riba medionan social pa mas informacion y anuncianan venidero pa loke ta trata e produccion.

VIRUS MORTAL: HANTAVIRUS TA CAUSA PANICO RIBA CRUCERO Y KLM! LOKE BO MESTER SA

ORANJESTAD – Mundo ta na alerta maximo ateobe despues cu un brote fatal di Hantavirus a wordo detecta riba e crucero MV Hondius. Loke a cuminsa como un biahe di placer for di Argentina pa Cabo Verde, a bira un pesadia cu morto y varios persona infecta. Awor, e virus a bati na porta di Europa y te hasta a wordo vincula cu un morto riba un buelo di KLM.

MORTO RIBA LAMA Y DEN AIRE

E situacion ta critico. Autoridadnan di salud mundial, bao guia di WHO, ta traha di nochi y dia pa investiga con e infeccion aki a plama. Te awor, tin confirmacion di casonan na Argentina, Cabo Verde, Canary Islands, South Africa, Suisa y Hulanda.

Un di e casonan mas spantoso ta di un señora Hulandes cu a fayece despues di tabata abordo di un avion di KLM for di Johannesburg pa Amsterdam. E tripulacion a baha e señora for di avion pa e no bula debi na su estado malo, pero e desenlace tabata fatal. Awor tin un buskeda intensivo pa TUR pasahero cu tabata riba e mesun buelo ey.

KICO TA HANTAVIRUS?

Esaki no ta un wega. Hantavirus ta un virus mortal cu ta wordo transmiti door di raton y otro tiponan. Bo por infecta door di:

Respira stof cu tin orina, saliva of sushi di rato.

Mishi cu superficie contamina.

Transmision di hende pa hende: Den e brote actual, ta sospecha e “Andes strain”, un variante



peligroso di Sur America cu ta pasa di un persona pa otro.

SINTOMANAN MANERA GRIP... PERO CU POR MATA!

Cuidao! Hopi hende ta kere ta un simpel verkoud, pero e por termina den deficiencia pulmonar:

Keintura halto y dolor di curpa.

Hopi cansancio y dolor di cabes.

Tos seco y problema serio pa hala rosea.

CON PA PROTEHA BO MES?

Maske autoridadnan ta bisa cu e riesgo pa e publico general ta abou, e miedo ta real. Pa preveni:

Guera contra raton: Evita tur contacto cu raton of nan sushi.

Limpiesa total: No bari stof seco

caminda tabatin raton; uza hopi desinfectante.

Accion rapido: Si bo a biaha recientemente y bo tin sintoma, bay dokter mesora!


Solo di Pueblo lo sigui vigila e situacion aki di cerca, mirando e link cu KLM cu ta bula den nos region.

Clasificados

SOLODIPUEBLO@GMAIL.COM

CEL. 585 9500

“HERENCIA NO TA PALABRA, TA RESPONSABILIDAD” EDUARD PIETERS TA CONECTA SACRIFICIO DI BOY ECURY CU E DECISIONNAN DIFICIL DI AWE



Durante e conmemoracion di jaarlijkse dodenherdenking na Aruba, parlamentario Eduard Pieters di fraccion di PPA no a keda djis den algo simbolico. El a uza e momento pa trece un mensahe cu ta bay mas

leu cu memoria historico: sacrificio sin accion awe no tin balor pa mañan. Durante un ceremonia yena cu respet y reflexion, e figura di Boy Ecury, un yiu di tera cu a entrega su bida pa libertad durante Di Dos Guerra Mundial,

a bira e punto di salida pa un analisis politico profundo. Pa Pieters, Ecury no ta solamente un heroe di pasado, pero un spiel pa liderazgo di presente. “Ta facil pa para na banda y critica. Pero ta mas dificil pa drenta den ‘ring’ y tuma e decisionnan cu tin consecuencia,” Pieters a indica, conectando directamente e sacrificio di pasado cu e responsabilidad di e lidernan di awe.

Sacrificio di ayera, falta di decision awe
E mensahe di Pieters tabata cla y sin filtro: Aruba no ta falta di talento, ni di potencial. Loke ta falta, segun dje, ta curashi pa tuma e decisionnan dificil. Den un tempo, unda e problemanan ta acumulando, manera presion financiero, sostenibilidad, infraestructura y gobernacion, el a alerta cu liderazgo no por

keda limita na discurso. “Herencia di heroe, manera Boy Ecury, no ta pa conmemora un biaha pa aña so. Mester biba di dje den cada decision cu nos tuma pa nos pais,” el a expresa.

Un Reino construi riba sacrificio, no conveniencia
Pieters tambe a conecta e conmemoracion cu e realidad di Reino Hulandes awe. El a enfatisa cu libertad, autonomia y respet entre e paisnan no a bin facil, pero a konkist’e cu sacrificio. Y p’esey mes mester proteg’e y defend’e cu mesun determinacion. Un Reino fuerte no ta construi riba conveniencia politico of presion institucional, pero riba respet mutuo, responsabilidad comparti y liderazgo, cu ta e columna vertebral.

Un mensahe pa generacion nobo
Un di e puntonan mas

impactante tabata su yamada na e hobennan. Pieters ta recorda nos hobennan, cu progreso semper ta existi sacrificio. “Bida no semper ta facil ni ‘color de rosa’. Bida ta cuestion di scoge pa haci loke ta corecto, aunke e por ta dificil,” el a enfatisa, poniendo cla cu futuro di Aruba ta depende di e decisionnan cu e generacion actual y esun di futuro lo tuma.

Na final Eduard Pieters a subraya cu un mensahe cu ta resona mas leu cu djis e momento ceremonial aki: conmemoracion sin actua, ta algo bashi. Pa Pieters, e legado di Boy Ecury ta uno di accion, no di silencio. Y esaki ta e reto pa Aruba awe: no djis honra pasado, pero tene e mesun curashi pa defende futuro. “Si nos kier un pais mas fuerte, nos mester tuma e decisionnan mas fuerte,” Eduard Pieters a conclui.

PARLAMENTARIO XIOMARA MADURO RIBA E RESTAURACION DI FORT ZOUTMAN: PONE E ECHO DEN CONTEXTO CORECTO



E siman aki, Minister Eman a anuncia cu lo cuminsa cu e restauracion di Fort Zoutman den cuadro di e revitalisacion di Centro di Oranjestad. Parlamentario Xiomara Maduro ta haya importante pa pone e cosnan den nan contexto corecto: e restauracion di e toren di Fort Zoutman no a cuminsa como un proyecto di campaña, ni como propaganda politico di Mike Eman, ni di su Gobierno di AVP-FUTURO. E restauracion aki no ta un proyecto di renobacion urbano, sino un proyecto di reconocimiento historico conecta directamente cu e disculpa y reflexion pa e pasado di esclavitud den Reino Hulandes.

Origen: disculpa di DNB pa negoshi di esclavitud

Na aña 2022, sr. Klaas Knot, Presidente di De Nederlandse Bank (DNB), a ofrece un disculpa oficial pa e pasado di esclavitud y e rol di DNB den esaki. Como parti di e disculpa,

Klaas Knot, President van DNB, bood 1 juli 2022 namens DNB excuses aan voor haar rol in het trans-Atlantisch slavernijverleden. Om aan deze woorden invulling te geven, heeft DNB vijf miljoen euro vrijgemaakt voor eenmalige bijdragen aan projecten voor educatie en behoud van historisch erfgoed.

DNB a destina €570.000 na Fundacion Museonan Arubano (FMA) pa restaura e toren di Fort Zoutman y desaroya material educativo pa scolnan, incluyendo historia manera esun di e catibo Virginia.

Restauracion como reconocimiento historico

Parlamentario Maduro ta haya importante pa subraya cu Fort Zoutman, construi na final di siglo 18, ta un simbolo historico di Aruba y un “place of memory” liga cu e historia di esclavitud den region. Esaki ta haci e proyecto relevante den termino di memoria colectivo y educacion. E proyecto di restauracion, por lo tanto, tin su base den reconocimiento historico, educacion y consenshi colectivo. E no ta un iniciativa nobo di Gabinete AVP-FUTURO, crea pa revitalisa e Centro di Oranjestad.

Proyecto di peso historico y educativo y no di desaroyo urbano

Aunke Minister Eman

kier presenta e proyecto di restauracion como un esfuerzo di Gobierno AVP-FUTURO pa “revitalisa Centro di Oranjestad”, nos mester keda fiel na e echo cu e financiamiento y e proposito original ta

directamente conecta cu e disculpa oficial y e proceso di reflexion historico. Desaroyo urbano ta importante, pero no mester wordo mescla ni confundi cu un proyecto cu tin un peso historico y educativo asina profundo. “Nos historia no ta instrumento di campaña politico. Ta un legado cu nos tin responsabilidad di respeta, comprende y traspasa na e siguiente generacion cu integridad, berdad y dignidad,” e

parlamentario ta expresa.

Exito y gratitud

Parlamentario Maduro ta spera cu Minister Eman por respeta e contexto den cual e restauracion ta tuma luga. “Nos ta desea FMA y Monumentenbureau, hopi exito cu e restauracion. Cada monumento cu wordo restaura den su gloria, ta sigui conta nos su historia. Danki DNB pa pone e recursonan disponibel pa Aruba,” ta e deseo final di e parlamentario.

electro ☆

AWO CASH DEN 3

📍 Avenida Milio Croes 41 ☎ (+297) 280-0222

30 AÑA DI PASION, DISCIPLINA Y GLORIA: STINGRAY TA CELEBRA DEN GRANDI!

E fin di siman aki, nos Piscina Olimpico Roly Bisslik, lo bira e escenario di energia, emocion y competencia intenso, ya cu Stingray Swimming Team ta celebra un logro hopi special: 30 aña di existencia den deporte di natacion na Aruba y cultivando hopi landador elite.

Pa tres decada, Stingray no solamente a forma e campeonnan, pero tambe a contribui na caracter, disciplina, amistad y soño deportivo di hopi landador. Generacion tras generacion di landador hoben a crece den e ekipo aki, cu a bira un simbolo di compromiso, excelencia y orguyo deportivo na Aruba.

E competencia lo reuni 9 ekipo diferente, 5 local y 4 ekipo di exterior participando, cu un total di 185 atleta, representando diferente categoria di edad y nivel competitivo. Durante cuatro dia di sesion emocionante, publico lo por disfruta di accion rapido, rivalidad sano y e momentonan inspira riba e startblok.

Programa di Competencia

Diahuebs – 6:15 PM

Diabierna – 7:00 PM

Diasabra – 6:15 PM

Diadomingo – 9:30 AM

E ekiponan cu ta participando ta: Aruba Dolphins, Barracudas Artistic Aruba, Bonaire Barracudas (Boneiro),



De Dolfijn (Surinam), Giants Aquatics Aruba, Sithoc Swim Club (Corsou), Sports4U, Stingray Swimming Team y TypHoon Swim Club (Corsou).

Stingray lo drenta den competencia cu un grupo di atleta fuerte, determina pa representa e colornan biña y cora cu orguyo, pasion y determinacion. Pero mas cu medaya y resultado, e fin di siman aki ta un celebracion di historia, sacrificio y comunidad.

Durante 30 aña, Stingray a contribui enormemente na desaroyo di landamento local y internacional, produciendo atleta nacional, varios campeon di CARIFTA, CCCAN, CAC, ODESUR, etc y record holder. Cada

hoben cu tabata parti di Stingray a siña balornan importante pa bida. E ekipo a crea un legado, cu ta sigui crece cada biaha cu un generacion nobo drenta e piscina.

E ambiente lo ta carga cu emocion, musica, orguyo y competencia di nivel halto. Esaki no ta simplemente un competencia mas di landamento... ta un celebracion di 30 aña di historia deportivo.

Stingray Swimming Team ta invita tur famia, amigo, ex-atletanan, patrocinadornan y amante di deporte general, pa bin apoya nos landadornan y forma parti di e momento historico aki.

Pasobra 30 aña no ta solamente un number...ta 30 aña di soño, sacrificio y orguyo Stingray.



	DIAHUEBS Competencia ta start 6.15pm
	DIABIERNA Ceremony: 6:40pm Competencia ta start 7:00pm
	DIASABRA Competencia ta start 6:15pm
	DIADOMINGO Competencia ta start 10:00am



Locatie:
PISINA OLYMPICO
Roly Bisslik



Na caminda pa Mundial

2026

MAROCCO LO TIN SU CENTRO DI OPERACION NA NEW JERSEY

E Gobernador di e estado di New Jersey, Mikie Sherrill, a anuncia oficialmente e diamars cu e seleccion nacional di Maroco, hunto cu tres otro ekipo mas, a scoge e estado cu lo fungi como sede di e gran final mundialista pa establece nan base di operacion.

Sherrill a expresa su entusiasmo den un comunicado comparti cu e embahador di Maroco na Merca, Youssef Amrani, resaltando e papel clave cu New Jersey lo hunga durante e Copa di Mundo.

Cuater seleccion lo establece nan campamento base

New Jersey no solamente lo ricibi Maroco, sino tambe tres otro seleccion di renombre cu a confirma nan estancia den e estado:

Maroco: E seleccion cu a sorprende mundo cu e di cuater luga na Qatar 2022, lo concentra na e Pingry College, situa na Basking Ridge (west di e estado).

Brasil: E unico pentacampeon mundial lo establece su base n'e Columbia Park Training Center, e ciudad deportivo di New York Red Bulls na Morristown.

Senegal: E gigante Africano lo hospeda na e Universidad di Rutgers na Piscataway.

Haiti: Segun informacion di The Athletic, e seleccion Haitiano lo instala su mes na e Universidad di Stockton (Galloway), den e parti zuidoost di e estado.



Preparacion y partidonan clave

Como parti di su preparacion final, e seleccion Noord Africano lo hunga un partido amistoso contra e seleccion di Noruega, lidera pa Erling Haaland, dia 7 di juni proximo. E encuentro aki lo tuma luga na e Sports Illustrated Stadium, apenas 30 minuut leu di e MetLife Stadium, caminda lo hunga e gran final dia 19 di juli.

Accion den e sede New York/New Jersey

E seleccionnan menciona lo tin un agenda ocupa den e area:

Brasil y Maroco lo protagonisa e prome partido oficial den e sede di New York/New Jersey dia 13 di juni.

Senegal lo hunga dos partido di e fase di grupo den e MetLife Stadium.

E anuncio aki ta reafirma New Jersey como un punto central pa e fanaticada y e ekipo nan cu ta cla pa e cita maximo di futbol global.

Clasificados

SOLODIPUEBLO@GMAIL.COM
CEL. 585 9500

MABON TA LUCI CARA NOBO: GOBIERNO Y FCCA TA ENTREGA DIESDOS CAS RENOBAY TA ANUNCIA MAS PROYECTO



Gobierno di Aruba, hunto cu FCCA, a tene un momento cu prensa diamars mainta na Caya Butishi, Mabon, pa comparti e progreso di e proyecto di renobacion di un edificio den e area.

Jessica van Montfoort-Posner di FCCA a expresa su satisfaccion cu e renobacion aki, unda trabounan grandi di mantencion di diesdos cas den e edificio ta completa oficialmente.

Director Tecnico y Comercial di FCCA, Sra. Julie Wever, a amplia riba e importancia di e proyecto y su impacto riba comunidad. Sra. Wever a expresa su orguyo cu e renobacion na Mabon ta representa un paso importante den un trayecto mas amplio pa mehora comunidadnan di barrio pa barrio. El a felicita Mabon pa e logro aki y a confirma cu trabaonan lo continua, incluyendo renobacion di mas cas y cura.

Den cuadro di e evento, residentenan tambe a comparti nan experiencia personal:

Louisa Ann Bradway, kende a biba den e edificio pa mas cu 22 aña, a describi Mabon como un bendicion y a expresa su gratitud profundo na Dios. El a comparti su aprecio sincero na FCCA y Gobierno di Aruba pa e trabou cu nan ta haciendo, no solamente na Mabon pero henter Aruba, enfatizando cu e tipo di esfuerso aki ta haci un diferencia real pa pueblo. Louisa tambe a gradici Prome Minister Mike Eman pa su sosten continuo.

Jelitza Croes, kende ta biba den e edificio pa mas di 20 aña, a comparti cu e ta orguyoso y contento di por biba na Mabon. El a describi e ambiente di e barrio como amabel y humilde, y a indica cu e renobacion a trece un cambio positivo importante. Anteriormente, e edificio tabata negligisha, pero awor, danki na e renobacion, e ta presenta un aparicion mas bunita, cu colornan alegre y un ambiente mas agradabel pa tur habitante. Durante e conferencia di prensa, Prome Minister



Mike Eman a expresa su gratitud profundo pa e presencia di habitantenan y comunidad di Mabon.

Eman a enfatisa cu cada biaha cu Gobierno drenta un barrio, nan ta mira e necesidadnan real di e comunidad y ta sinti e reto cu ciudadanonan ta confronta den nan bida diario. Segun Eman, esaki ta reenforza e responsabilidad di Gobierno pa actua y busca solucionnan concreto pa mehora calidad di bida.

Prome Minister a subraya cu Gobierno y FCCA ta trahando hunto pa analisa e necesidadnan di cada barrio y traduci nan den plannan concreto. E meta ta cla: duna cada ciudadano un hogar digno y un ambiente di bida mas humano y sostenibel.

Eman a celebra e hecho cu diesdos famia na Mabon a ricibi nan casnan completamente renoba, describiendo esaki como un ehempel di e impacto positivo cu por logra ora

Gobierno, comunidad y partnernan traha hunto.

Segun e Prome Minister, coordinacion entre Gobierno y FCCA ta esencial pa yega na cambio real den barionan. El a gradici Sra. Julie Wever y e team di FCCA pa nan compromiso y colaboracion continuo.

Eman a recorda cu mas cu un aña pasa el a bishita Mabon y a nota e estado deteriora di e edificio. Den colaboracion cu FCCA, a logra un proceso di limpieza, renobacion y transformacion cu awe a resulta den un edificio completamente renoba y entrega na comunidad.

Prome Minister a haci un apelacion na ciudadanonan pa cuida nan medio ambiente y uza infraestructura publico na un manera responsabel, incluyendo maneho di desperdicio y mantencion di limpieza den barrio.

Ademas, Eman a menciona cu Gobierno ta

sigui cu proyectonan di renobacion y desaroyo den otro barionan manera De Vuyst, Bushiri y Village, unda infraestructura y casnan lo wordo mehora gradualmente. Den Village especificamente, mas o menos 141 cas lo wordo renoba despues di un periodo largo di espera.

Eman a recorda cu algun aña pasa, Gobierno a yega na un acuerdo importante cu FCCA riba maneho di debey subsidio pa vivienda, unda e compromiso financiero a wordo estructura pa mantene vivienda accesibel pa ciudadanonan.

Segun e Prome Minister, e tipo di acuerdonan aki ta muestra cu ora Gobierno y partnernan haci un esfuerso conhunto, e resultado ta visibel y positivo pa comunidad.

“Progreso no ta bin su so, pero ta resultado di trabou duro, compromiso y decisionnan cu ta enfoca riba bienestar di pueblo,” segun Eman.

ACF TA TRECE NATURALES CERCA DI E COMUNIDAD DURANTE OPENDAG DI MARINIERSKAZERNE



ORANJESTAD, ARUBA — 6 MEI 2026 – Aruba Conservation Foundation (ACF) unbes mas a participa den e evento anual di Open Dag Marinierskazerne basa riba un colaboracion di hopi aña, cu un compromiso comparti di conecta cu e comunidad y crea un espacio pa intercambio di informacion y conocimiento.

Durante henter e dia, ACF e duna bon bini na un fluho di bishitante na su stand interactivo, unda cu muchanan y hende grandi a muestra interes di conoce mas di Aruba su naturalesa. Di preguntanan curioso pa combersacionan cu mas profundidad, e interes pa comprende e medio ambiente y naturalesa di Aruba tawata grandi.

Bishitantenan por a conoce di cerca e diferente proyectonan di restauracion cu ACF tin andando. Un seccion tawata dedica na e trabounan di restauracion di rifnan di coral cu diferente rifnan artificial cu a wordo poni den e diferente areannan di Parke Marino Aruba. Otro seccion tawata dedica na e trabounan di restauracion di mangel, mustrandu con e canalnan di mangel den e area di Spaans Lagoen ta wordo restaura pa drecha e fluho di awa na e sistema di mangel. Un ultimo session tawata enfoca riba Aruba su matanan nativo, unda cu a trece un variedad grandi di matanan cu ACF ta cultiva y crece den su propio green house na Parke Nacional Arikok y cu pronto lo wordo planta den naturalesa di Aruba como parti di ACF su plan



di restaura habitatnan cu matanan nativo den areanan protegi. ACF kier gradici Marinierskazerne pa e colaboracion continuo y pa duna ACF un espacio durante Opendag pa asina conecta den un manera interactivo cu e comunidad cu ta di bishita.

Probechando di e curiosidad y interes demonstra durante e dia aki, ACF kier a extende un invitacion na e comunidad

di Aruba pa tuma parti den e di dos session di aña 2026 den su programa informativo di Naturalesa ta Papi: Encuentro di Conocemento cu lo enfoka riba e tema di matanan nativo. E sessionan lo tuma lugar lo siguiente:

- 26 mei 2026 – Centro di Bario Dakota di 6:45PM pa 8:45PM
- 28 mei 2026 – Teresita Center San Nicolas di 6:45PM pa 8:45PM

Participacion ta completamente gratis y tur cu kier participa por registra usando e siguiente link:

Link: [NATURALES TA PAPIA](#) ta presenta: Matanan Nativo – Fill out form

Naturalesa ta papiando y momentonan asina ta con hende por muestra cu nan ta scuchando. Pa mas informacion por bishita www.acf.aw of email info@acf.aw.

MINISTER PLENIPOTENCIARIO MILDRED SCHWENGLE A BISHITA EMBAHADORA DI ESPAÑA

Den Haag – Minister Plenipotenciario Mildred Schwengle a haci riba invitacion - un bishita di cortesía na e embahador di España na Hulanda, Consuelo Femenía Guardiola. Tambe presente na e encuentro aki tabata Juan Antonio Varela Donoso, advisor económico na e embahada di España.

Durante di e combersacion a papia riba diferente puntonan interesante den e relacion entre España y

Aruba.

E prome puesto diplomatico di Embahador Femenía Guardiola tabata na 2011 na Riga, capital di Letonia. Entre 2018 y 2021 Femenía Guardiola a ocupa e puesto di embahador pa España na Malta.

Na Februari 2022 ela keda instala oficial como e representante diplomatico di España pa Reino Hulandes.

Nota pa redaccion: E potret ta cortesía di Gabinete di Aruba



TEAMARU den preparacion pa Weganan Suramericano SantaFe2026 HEFE DI MISION Y DIRECTORA TECNICO LO ATENDE REUNIONNAN PA WEGANAN RAMERICANO

Ayera tardi e “Chef de Mission” di Weganan Suramericano S”anta Fe 2026” ali rumbo pa Argentina pa asina atende e reunionnan di Hefe di mision, pa asina cera conoci cu e comision organisador di e Weganan Suramericano, ademas di haya tur informacion importante pa TEAMARU su participacion na e Weganan den luna di september proximo. Hefe di mision pa e Weganan aki lo ta Mildred Wever, cu

sigur ta bon conoci dentro di e mundo di deporte na Aruba. Mildred lo forma parti di un delegacion di Comité Olimpico Arubano (COA) pa promebiaha, pero ta conta cu su experiencia y liderazgo como un dirigente deportivo cu pa hopi aña a aporta na deporte na Aruba.

Hunto cu Mildred a bay e Directora Tecnico di COA, Monica Fajardo. Monica ta encarga cu e parti tecnico di e delegacionnan cu ta

representa TEAMARU y lo bay pa asina ricibi tur informacion relevante y importante, ademas di conta cu hopi experiencia di participacion na Weganan di varios Ciclo Olimpico.

Como ekipo cu ta representa TEAMARU na e reunionnan aki, nan lo percura pa tur preparacion pa Aruba su participacion na e Weganan Suramericano Santa Fe 2026. Hopi exito!



DIADOMINGO 3 MEI 2026 A TITULA CAMPEÓN COPA LABOR 2026



Palm Beach YoYo's Power na veld di kudawecha
Un solo team e mesun Famia mesun meta
Palm Beach YoYo's Power Campeón Copa
Labour 2026
Yoyo's kier a duna Danki na nos Sponser pa
deposita confianza na nos *D' TANI

CONSTRUTION SERVICES*
Wega Final Young

.	R	H	E
S.Squad	5	10	2
Yoyo's Power	7	11	1

WP. Noli Gutierrez
LP. Ray Bernabela

Best Batters Y.Power
Brandon Rincones - 3
Jose Lugo 3 - 2 ku 1Homerun
Daniel Lugo 2 - 1
Rolando Petronia 2 - 1
Best Batters S.Squad
Kieth Hooker 4 - 3 ku 2Homerun
Jomark Flanegin 3 - 2



Mitchell Martes 2 - 1
Darl Quandus 2 - 1

MASHA PABIEN PA PALM BEACH YOYO'S
CHAMPION COPA LABOR 2026

MASHA PABIEN TMB NA SUICIDE SQUAD
CU A KEDA SUB CHAMPION...
DANKI NA TUR TEAM CU COMPETI DEN
CATEGORÍA AKI ..MASHA DANKI GUYS

**TUMA ACCION PA PREVENI,
PROTEHA Y STOP DENGUE
CON NOS POR STOP
DENGUE?**



“IT’S ONLY THE BEGINNING” TA SOLAMENTE E COMIENSO

Minister di Vivienda, Infraestructura, Servicio Interno y Comunicacion drs. Rene Herdé, a anuncia su compromiso di renobacion strategico pa e desaroyo continuo di revitalisacion di San Nicolaas. Cu un bista cla pa crecimiento sostenibel y participacion di comunidad, esaki ta marca e inicio di un serie di iniciativa transformativo cu tin como meta pa fortalece e vitalidad economico, social y cultural di e distrito. Un prioridad clave ta e creacion di un centro di ciudad yamativo pa San Nicolas. Door di establece un hub central pa facilita e organizacion di evento y actividadnan cu lo stimula comercio local pa atrae bishitantenan y fortalece un sentido di comunidad. E enfoke aki tambe lo sirbi como modelo pa reactiva Oranjestad.

Inversionnan significante den infraestructura ya ta den marcha. E renobacion di Kaviti y De Vuyst, hunto cu mehoracion importante den e area di Main Street, ta refleha nos compromiso pa mehora accesibilidad, seguridad y e experiencia urbano en general. E proyectonan aki ta diseña pa eleva tanto e funcionalidad como e atraccion di San Nicolaas como un distrito clave pa Aruba.

D en colaboracion cu Minister di Economia, tambe nos lo lansa un masterplan ambicioso pa Baby Beach. Esaki ta inclui desaroyo di kioskonan moderno, mehoracion di e playa, construccion di un pier y instalacion di facilidadnan sanitario publico. Mejoracion similar lo wordo ehecuta na Mangel Halto, pa asina garantisar cu e area di costa ta cumpli cu e standardnan



mas halto pa residente y bishitante.

Preservacion cultural y desaroyo turistico ta keda central den nos esfuersonan. E finalisacion di e proyecto di Carnival Village lo fortalece San Nicolaas como un destino cultural. Ademá, lo otorga permiso pa kioskonan den Carnival Village, creando oportunidad nobo pa empresarionan local. Nos ta orguyoso pa anuncia

cu construccion di MFA San Nicolaas lo cuminsa e aña aki. E proyecto tan spera aki, cu tabata para for di 2017, ta representa un inversion importante den infraestructura y servicio di comunidad. Desaroyo di vivienda tambe ta sigui avansa. Nos ta sigui cu e finalisacion di benta di casnan den Colony, brindando mas oportunidad pa residente inverti den nan futuro. Na mes momento, tin

esfuersonan pa modernisa y mehora e area rond di Rodgers y Baby Beach, pa asina mantene nan atractivo y accesibel. E iniciativa combina aki ta mustra nos compromiso firme cu San Nicolaas.

Esaki no ta e fin, esaki ta solamente e comienso. Hunto, nos ta traha pa un futuro mas fuerte y dinamico pa e distrito di San Nicolaas y pa Aruba en su totalidad.

MAX Y E TAKI ENCANTA

ibiblioteca a ricibi e buki pa mucha ‘Max y e taki encanta’ for di Tanchi Esme! Un buki pa mucha na Papiamento. Esaki ta otro fabula cu tin varios mensahe den dje, cu tur mucha ta igual, ta papia tocante diferente fruta cu ta crece aki na nos dushi isla Aruba y e aventura di Max. ‘Tanchi Esme’ ta e nomber di cariño di sra. Esmeralda Tromp-Jacobs y Tanchi Esme a participa diferente biaha na e Festival

di Buki pa Mucha. Esaki ta un buki bunita y colorido ilustra pa Gairo Tromp. Na biblioteca nan ta masha contento cu un otro publicacion pa e coleccion hubenil. E coleccion di buki pa mucha na Papiamento ta sigui crece y por ofrece tur mucha un buki pa lesa.

E buki a keda publica cu sosten financiero di UNOCA y SETAR. Diseño grafico pa e produccion aki ta di Sheila

Werleman y Marlon van der Linda a haci coreccion di Papiamento.

Un consejo di Tanchi Esme: “Tur mucha ta biba den nan mundo di fantasia. Nos, hende grandi, nunca mester stroba nan di biba nan infancia. Laga nan mente explora nan propio mundo encanta.”

Por sigui lesa mas tocante Tanchi Esme su bukinan riba website di biblioteca of pasa fia e buki.



Departamento di Labor y Investigacion hunto cu Minister di Turismo, Transporte y Labor,

MR. WENDRICK CICILIA TA INTRODUCI PROYECTO PILOTO ‘TIENDA LEGAL LABORAL’: UN INICIATIVA INNOVATIVO PA CONSEHO LABORAL DEN BARIO

ORANJESTAD, Aruba – Dialuna 4 di mei 2026, Directie Arbeid en Onderzoek (DAO) a habri oficialmente e portanan di ‘Tienda Legal Laboral’ (TLL) na MFA Savaneta. E proyecto piloto innovativo aki ta marca un transformacion importante di loke ta e seccion di Conflicto y Retiro. Cu apertura di un localidad nobo den MFA Savaneta, DAO ta trece conseho laboral y informacion preventivo literalmente mas cerca di e ciudadano.

For di conflicto pa prevencion

Lansamento di Tienda Legal Laboral ta mas cu simplemente un cambio di nomber; e ta representa un manera nobo di traha y di ta proactivo. Caminda antes e enfoca tabata riba soluciona conflictonan laboral cu a surgi caba, TLL ta fungi awo tambe como un centro di informacion central enfoca riba prevencion. Door di informa trahado y dunado di trabou den un fase trempa tocante nan derechonan y debernan, TLL ta aspira na un mercado laboral mas sano y transparente na Aruba.

Accesibel y den bario

Un punto clave di e proyecto piloto aki ta e accesibilidad. Cu Tienda Legal Laboral nos ta baha e drempel pa conseho significativamente, door di ta presente den bario, cuminsando cu MFA Savaneta. MFA Savaneta

ta e prome localidad cu ta habri su portanan, y pronto lo sigui cu otro MFAnan riba e isla pa asina por ofrece e servicio aki na mas luga pa brinda apoyo den un ambiente neutral y di confiansa. Tienda Legal Laboral ta aspira pa brinda servicio basa riba cinco pilar: Husto, Profesional, Servicial, Uniforme y Accesibel. Sea ta trata di pregunta tocante pago di salario, control riba relacion di trabou, contrato laboral of mediacion den conflicto laboral; Tienda Legal Laboral t’ey tanto pa e trahado como pa e dunado

di trabou.

Intake

Pa mantene e drempel mas abou posibel, TLL lo funciona a base di ‘intake’. Nos lo purba atende ciudadanonan mesora segun disponibilidad. Si esaki no ta posibel, nos ta yuda traha un cita pa un otro momento. Cuminsando dialuna 4 di mei, e siguiente orarionan di apertura pa intake lo ta vigente:

- Dialuna - Diabierna: 08:00 – 12:00 & 13:00 – 15:30
- Diaranson: 08:00 – 12:00





Localidad y contacto

E proyecto piloto ta drenta na vigor oficialmente na MFA Savaneta (Savaneta 121-F). Pa ciudadanonan cu ta prefera di haya informacion via telefon of e-mail prome, TLL ta disponibel temporalmente via:

- E-mail: dao.tll@aruba.gov.aw
- Telefon: 5932107

Departamento di Labor y Investigacion ta invita e comunidad completo pa bin cera conoci cu e forma nobo di servicio aki. Hunto nos ta traha riba husticia na pia di trabou, eynan mes den bo bario.

 Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado: Sorteo di Merdia - May 06, 2026		
 Sorteo # 4966 8186 8516 0029  X2  Sorteo # 4966 3542  X3  Sorteo # 3022 2342  Sorteo # 4966 6540 Acuario  Sorteo # 1840 853  X3	 Sorteo # 0 x Jackpot 0 x Match 4+ 0 x Match 4 0 x Afl. 12,00  Sorteo # 0 x Jackpot 0 x Match 4 0 x Afl 8,00  Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl. 15,00   Sorteo #	Joker Letter Proximo Jackpot 240.000,- Proximo Jackpot 50.000,- Mega Ball Proximo Jackpot 400.000,- Afl. 1.400.000,- 

 Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado: Sorteo di Anochi - May 06, 2026		
 Sorteo # 8839 3907 9831 3881  X2  Sorteo # 7883 5467  X2  Sorteo # 2588 2131  Sorteo # 6642 1451 Virgo  Sorteo # 1572 030 	 Sorteo # 0 x Jackpot 0 x Match 4+ 0 x Match 4 0 x Afl. 12,00  Sorteo # 7171 1 x Jackpot 26 x Match 4 363 x Afl 8,00  Sorteo # 1867 0 x Jackpot 2 x match 4 27 x Afl. 500,00 356 x Afl 50,00 394 x Afl. 15,00   Sorteo #	Joker Letter Proximo Jackpot 240.000,- 02-09-19-27-30 Proximo Jackpot 50.000,- 06-08-09-18 Mega Ball 10 Proximo Jackpot 400.000,- Afl. 1.400.000,- 

SOPÍ DI LETRANAN

Q	S	L	W	S	R	J	L	E	N	G	U	A	J	E	U	V	M	K	I
R	D	R	V	P	G	X	H	Ñ	I	G	R	L	N	R	T	D	T	U	W
V	E	R	B	O	S	X	P	P	Z	M	I	A	Ñ	A	Ñ	T	L	Q	Z
B	N	Y	K	R	T	N	M	B	H	Ñ	Ñ	C	B	Ñ	D	M	V	W	N
S	O	G	N	O	T	C	I	D	L	I	F	I	Q	M	I	Q	E	I	S
J	I	Ñ	A	D	Q	R	R	H	A	N	K	T	S	E	A	J	E	H	M
A	S	O	D	A	T	C	I	D	O	F	B	A	I	A	L	R	C	D	P
S	N	W	H	K	R	I	P	T	N	U	B	M	R	C	O	J	R	E	N
A	E	S	C	R	U	C	I	G	R	A	M	A	S	T	G	M	X	R	Y
X	R	A	A	X	C	C	O	U	L	Q	R	R	K	I	O	U	J	I	I
N	P	P	I	R	I	R	H	I	F	X	D	G	M	V	S	R	W	P	A
O	M	V	Ñ	A	E	L	S	K	Q	O	L	U	C	I	T	R	A	X	F
R	O	C	S	M	P	E	J	S	X	G	K	H	T	D	R	E	M	D	F
E	C	M	U	T	D	C	G	I	Q	A	S	X	D	A	F	O	G	K	U
N	S	N	Z	A	I	T	V	Z	O	A	E	U	K	D	J	D	Q	W	I
E	O	W	O	D	U	U	A	O	M	A	H	J	X	E	F	M	Z	Z	Q
G	T	C	F	Ñ	E	R	M	E	P	Ñ	Y	P	I	S	J	A	F	J	O
M	X	G	J	N	E	A	T	A	Q	S	Y	E	N	C	P	X	Z	X	W
O	E	B	H	X	L	Ñ	Y	X	L	R	G	Ñ	Y	U	F	W	U	B	L
J	T	G	Q	A	Ñ	R	N	M	Z	R	C	D	Y	Ñ	O	L	V	J	M


- ACTIVIDADES
- ARTICULO
- COMPRESION
- CRUCIGRAMAS
- DIALOGOS
- DICTADOS
- DICTONGOS
- GENERO
- GRAMATICA
- LECTURA
- LENGUAJE
- NOTICIAS
- NUMERO
- SILABAS
- TEMAS
- TEXTOS
- VERBOS

SUDOKU

	7					3	8	5
	2					7		
8								
			3		5			
		1			6		4	
					2	8	9	
1	9			5				
6			8					9
5						1	3	2

		8				7		
9	3		4					
			3	8				5
4		3	7			9		
	6				9		8	4
5				3			1	6
	4		1	6				8
					7			

		7			4		9	2
		5		7			1	
					2	5		
		4			6			8
			2			3		7
	3	6	5					
	5							4
7			3				2	
					8			



Oracion di dia

Un feliz dia yena di hopi fe y speransa den nos bon Dios

”...sino conta e generacion venidero: esta gloria di Señor, su poder, ye cosnan milagroso c’El a haci.” (Salmo 78, 4bc)
E Evangelio di awe ta cuadra, manera semper, tempo cu ami tabatamucha. Mi mayornan semper tabata educa mi tocante di Dios, CristoHesus y Spirito Santo. Y un Bijbel no tabata haci falta. Haci oracionta cos di tur dia. Y sin falta bishita e cas di Dios.

Awendia nos ta ripara e generacion di awo, no tin mucho balor pa cuDios. Pero anos a sigui conta nos yiunan tocante di Dios manera nosgrandinan a haci? Anos a siña e hubentud tocante e milagronan ysacrificio cu Cristo Hesus a haci? Of di e donnan cu Spirito Santo tinpa nos? Y anos a tene man di nos yiunan, hibando nan, tur siman, pacas di Dios pa scucha su Palabra? Ban sigui cu e bunita custumber cunos grandinan a haci. Ban sigui hiba e futuro generacion ariba ecaminda cu Cristo Hesus a traha pa nos. ”...pa nan tambe confia denSEÑOR, no lubida Dios su obranan grandi...”(Sal 78, 7)
Oracion: Señor mi Dios motiva mi y guia mi, cu yudansa di SpiritoSanto, ariba mi responsabilidad pa conta y educa e generacion nobo di
Bo Maraviya.
Y inspira nan pa nan sigui conta na e siguiente generacion.
Amen.

FORTALEZA PA FAMILIA

Scirbi pa Pastor Marcel Balootje

KICO LO TA E FUTURO DI ESNAN CU NO TA KERE DEN CRISTO HESUS?

Hopi hende ta preocupa kico lo pasa cu nan den futuro, hopi hende ta corre tras di profecia, pero masha poco bo ta tende cu un profeta bisa un persona cu si bo no ta kere den Cristo Hesus , lo bo no hereda e reino di Dios, of masha poco bo ta tende un profeta a bisa un persona cu e tin cu pone su bida na ordo cu Dios.

Jonas mester a bay Ninive y predica arepentimento na e pueblo.

Elias tabata predica arepentimento na e pueblo y hasta a confronta rey Acab.

Juan Bautista tabata predica arepentimento na e pueblo.

Tur tres tabata profeta, tur tres tabata haci mesun cos, y awor den nos tempo aki, e situacion ta pio,, pasobra maldad a aumenta mundialmente.

Awor locual ta para scirbi mester wordo proclama y predica pa tur hende sa, pasobra lo no ta bay tin excuus.(Romanonan 1: 20 y Romanonan 2:1).

Pasobra Dios a stima e mundo asina tanto cu e a duna Su Yiu unigenito pa ken cu kere den dje no bay perdi ma tin bida eterna.(Juan 3:16).

Esun cu kere den e Yiu tin bida eterno, ma esun cu no obedece e Yiu lo no mira bida, ma e furia di Dios lo keda riba dje.

Y E a bisa nan, Boso ta di aki bao,Ami ta di ariba, boso ta di e mundo aki,Ami no ta di e mundo aki. Pesey Mi a bisa boso cu boso lo muri den boso picanan, pasobra si boso no kere cu ta Ami t'E, boso lo muri den boso picanan, (Juan 8:23-24).

Hesus a bise, Ami ta e caminda, y e berdad, y e bida, ni un hende, no ta bin serca e Tata sino pa medio di Mi.(Juan 14:6).

Si bo confesa cu bo boca Hesus como Senjor, y kere den bo curason cu Dios a lante for di mortonan lo bo ta salba,Pasobra cu curason hende ta kere pa hanja husticia,y cu boca e ta confesa pa hanja salvacion.(Romanonan 10:9-10).

Awendia tin hopi ta bira rond y bisa cu nan no ta cambia, pasobra nan ta kere cu ta religion ta salba, pero alcontrario ningun religion no por salba ningun hende, pasobra den Juan 3:16 Dios no a bisa si bo kere den religion , Dios a bisa si bo kere den Su Yiu Hesus Cristo lo bo tin bida eterna.

Pesey ta para scirbi pa tur hende tuma bon nota den Hechonan 4 :12 bisando: Y no tin salvacion den ningun otro, pasobra no tin bao di cielo ningun otro nomber cu a wordo duna na hende, pa medio di cual nos mester wordo salba.

No ta tempo pa haci wega, ni tampoco kere den cosnan cu no ta hiba na bida eterno, pasobra mirando e asunto den tur aspecto di palabra: Si un hende no ta kere den Cristo Hesus como Su Senjor y Salvador den ken e ta kere anto? Y cual speransa e ta biba cune, pasobra un persona cu ta hiba un bida sin Cristo Hesus no tin speransa.

Si un hende su nomber no wordo haya den e buki di bida,e a wordo tira den e lago di candela. (Revelacion 20:15). E versiculo aki ta para scirbi den tur Bijbel cu un traduccion diferente , y cu un formacion di palabra diferente pero e ta nifica mesun cos.

Bo no por hereda reino di Dios sin acepta Cristo Hesus.

Tur rudia mester dobla y tur lenga mester confesa cu Hesus Cristo ta Senjor.

Sinceramente, Pastor Marcel Balootje..

DOCTER IKE POSNER OUR HEROE


He stands firm on what he believes
He defends our health system
He speaks up for what is the truth
He is a Docter warrior
Standing up for fairness
He is good in what he does
We must stand with him
For his love for all patients is big,
and his heart is at the right place
He knows what is best for Aruba,
He knows what has to be done
Docter Ike Posner is the blessings
He is a genius, he is smart

He has experience
He is a good human being
He is a family man
Aruba listen to Docter Ike
It is not just what we like
It is the best solution for Insam
and our hospital
To stay separte on their own, yet
helping eachother
San Nicolas is on the other side of
the island
And deserves to have Insam with
their own Director, staff and

professional personel
To the government our
petition not to screw up
The people has spoken
through Docter Ike
Whom we love and like
For he knows what is what
Just poet Lady Ruth's
token of faith in God for
using Docter Ike in this
matter,
For he knows better !!!
With love for Aruba



'DODENHERDENKING': RECORDANDO SACRIFICIO PA PROTEHA LIBERTAD



Den un ambiente di respet profundo, Aruba a conmemora awe tardi e Ceremonia di Dodenherdenking, rindiendo homenahe na tur esnan cu a perde nan bida defendiendo libertad y dignidad humano durante Segunda Guerra Mundial y otro conflicto di guerra of mision di paz.

Eceremonia, organisa door di Comision Celebracion Dianan Nacional (CCDN) hunto cu Gobierno di Aruba, a tuma luga na Urban Pocket Park, un espacio recientemente renoba, cu a crea un marco digno pa reflexion y memoria.

Entre esnan presente tabatin Su Excelencia Gobernador Alfonso Boekhoudt, Prome Minister Mike Eman, Presidente di Parlamento Marlon Sneek, miembronan di Consejo di Minister y Parlamento, hunto cu representantenan

di Marina Real, famia y hobenan di comunidad.

Un momento central di ceremonia tabata e dos minuutnan di silencio, sigui pa colocacion di krans, como simbolo di respet pa esnan cu a sacrifica nan bida pa libertad. E acto aki a amplia su significado pa inclui no solamente e victimanan di Segunda Guerra Mundial, pero tambe tur esnan cu a lucha pa paz y humanidad den diferente parte di mundo.

Den su discurso, Prome Minister Mike Eman a invita comunidad pa reflexiona riba e balor real di libertad, un derecho cu no a bin vanzelfsprekend, pero tabata gana cu sacrificio.

El a comparti e historia di Boy Ecury, un hoben di apenas 22 aña, kende a demostra corahe extraordinario durante e guerra. Aunke e conflicto no tabata su mesun bataya, el

a dicidi pa defende libertad y humanidad, poniendo su bida na riesgo.

Segun e Prome Minister, e tipo di sacrificio aki ta recorda nos cu humanidad ta bay mas leu di frontera, cultura y origen.

"Tin momentonan den historia caminda persona ta scoge pa defende no solamente un pais, pero humanidad mes. Esaki ta e tipo di ehempel cu nos mester tene presente," el a expresa.

E ceremonia a culmina cu un gesto simbolico di hobennan di diferente disciplina, incluyendo deporte y servicio social, cu a pone flor como muestra di gratitud y compromiso pa mantene e balor di libertad bibo den generacionnan cu ta bin. Dodenherdenking ta keda un recordatorio poderoso: cu un pueblo cu reconoce su pasado, ta miho prepara pa proteha su futuro.